



اسم المائة: اللهم أعني

من سلسلة: أفكار الصلاة

لفضيلة الشيخ: و. عبد الرحمن الصاوي

مائة

Way2allah.com



إنتاج فريق التفريغ بشبكة الطريق إلى الله



اسم المادة: اللهم أعني

من سلسلة: أذكار الصلاة

لفضيلة الشيخ: د عبد الرحمن الصاوي

رابط المادة: <https://way2allah.com/khotab-item-149789.htm>

السلام عليكم ورحمة الله وبركاته، أعوذ بالله السميع العليم من الشيطان الرجيم، بسم الله الرحمن الرحيم، إن الحمد لله نحمده ونستعين به ونستغفره، ونعوذ بالله -تعالى- من شرور أنفسنا وسيئات أعمالنا، من يهده الله فلا مضل له، ومن يضلل فلا هادي له، وأشهد أن لا إله إلا الله وحده لا شريك له، وأشهد أن محمداً عبده ورسوله.

"يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ" آل عمران: ١٠٢، "يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ نَفْسٍ وَاحِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا اللَّهَ الَّذِي تَسَاءَلُونَ بِهِ وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا" النساء: ١، "يَا أَيُّهَا الَّذِينَ آمَنُوا اتَّقُوا اللَّهَ وَقُولُوا قَوْلًا سَدِيدًا \* يُصْلِحْ لَكُمْ أَعْمَالَكُمْ وَيَغْفِرْ لَكُمْ ذُنُوبَكُمْ وَمَنْ يُطِعِ اللَّهَ وَرَسُولَهُ فَقَدْ فَازَ فَوْزًا عَظِيمًا" الأحزاب: ٧٠: ٧١.

أما بعد، فإن أصدق الحديث كتاب الله -تعالى-، وخير الهدي هدي محمد -صلى الله عليه وآله وصحبه وسلم-، وشر الأمور محدثاتها، وكل محدثة بدعة، وكل بدعة ضلالة، وكل ضلالة في النار.

ثم أما بعد، فمرحباً بكم أيها الإخوة الكرام الأحباب في هذا البيت الطيب العامر المبارك على طاعة الله -جل وعلا-، وأسأل الله -تعالى- كما جمعنا في هذا المكان المبارك، أن يجمعنا سوياً مع النبي -صلى الله عليه وسلم- في أعلى جنات الخلد بغير حساب ولا عذاب، إنه ولي ذلك، وهو نعم المولى ونعم النصير.

ثم أما بعد، لا زلنا أيها الكرام الأحباب نعيش ونُعاش ونحاول أن نفهم أذكار الصلاة؛ لأن هذا يتكرر بفضل الله -جل وعلا- من المسلم كثيراً، فكما مضى بنا الكلام حول أذكار الصباح، ثم شرعتُ معكم في أذكار الصلاة نعيشها، ودائماً أؤكد على هذا الأمر: إننا نحاول أن نُخرج أي ذكرٍ أو أي دعاءٍ من قلوبنا، نفهمه ونُخرجه من قلوبنا؛ حتى يقبله الله -جل وعلا- منا؛ لأن الله -جل وعلا- لا يقبل الدعاء من قلبٍ غافلٍ لاهٍ، فليس لك من دعائك ولا من استجابة دعائك إلا ما عَقَلْتَ بقلبك، كما قال النبي -صلى الله عليه وسلم-: "واعلموا أنّ الله لا يستجيبُ دعاءً من قلبٍ غافلٍ لاهٍ"<sup>١</sup>.

<sup>١</sup> حسنه الألباني.

ومن أذكار الصلاة التي حث النبي -صلى الله عليه وسلم- حبيبه معاذ بن جبل ألا يتركها أبداً، يعني مش النبي قال له قُل كذا، لا النبي قال له: ما تسيبهاش، كما ثبت في صحيح مسلم أن النبي -صلى الله عليه وسلم- قال لمعاذ بن جبل حين خرج من الصلاة وشبَّك النبي -صلى الله عليه وسلم- يده في يده.. أنا عايزك تعيش الفرحة اللي سيدنا معاذ عاشها، ولو الكلام ده حصل لك في الرؤيا، مش في الحقيقة بس، في الرؤيا، إيه اللي هتشعره؟

النبي -عليه الصلاة والسلام- شبَّك أصابعه في يد معاذ وهو خارج من الصلاة، ثم قال النبي -عليه الصلاة والسلام- لمعاذ: **"والله إني لأحبُّك"**<sup>٢</sup>، أنت متخيل النبي، بيحلف بالله لمعاذ يقول له: **"والله إني لأحبُّك"**، والله يا إخواننا الكلمة دي يعني تخلي قلبك يطير لو أنت استحضرتها.

**"والله إني لأحبُّك، والله إني لأحبُّك"** مرة ثانية، وقيل أنّ اللي قال الثانية معاذ، يعني معاذ النبي شبَّك يده في يده وسمع النبي يقول له... تخيل كده لو شيخ من المشايخ اللي بتحبهم الكبار قوي اللي أنت نفسك تشوفه، واللي لما بتشوفه نفسك الناس كلها تعرف أنك شُففته، وعاوز صورة جنبه وتحتها على الخلفية أو بروفايل الواتس، متصور أنت جنبه مبسوط، شيخ، ويقول لك كده: والله أنا بجدك في الله، فما ظنك لو النبي اللي عمل لك كده، النبي يشبك يده في إيدك، وهو اللي يفضل ماسك إيدك ويقول: والله أنا بجدك في الله.

**"والله إني لأحبُّك"**، فقال: **"والله إني لأحبُّك"** يعني أنا برضه والله بجدك يا رسول الله، فقال له النبي -صلى الله عليه وسلم-: **"لا تدعني في دُبُرِ كلِّ صلاةٍ تقول: اللهم أعني على ذكرك، وشكرك، وحسن عبادتك"**، دي يا إخواننا وصية الحبيب حبيبه، يعني مش أي وصية، مش كلمة وخلص، مش صحابي يبجي يسأل النبي سؤال يقول له: **"لا تغضب"**<sup>٣</sup> ويمشي، لا ده النبي -عليه الصلاة والسلام- هو اللي خد بإيده، وهو اللي قال له: أنت حبيبي، عشان تعرف أن الوصية الحاية دي وصية واحد بيحب لك الخير.

وخلى بالك ده مش أي صحابي، ده معاذ بن جبل، عارفين معاذ بن جبل؟ اللي هو إمام العلماء أو سابق العلماء، ده عالم الأمة، النبي -عليه الصلاة والسلام- بشره أنه يسبق العلماء يوم القيامة رميةً بحجر، يعني هو قبل العلماء كلها، أعلم الأمة بالحلال والحرام، معاذ بن جبل ده اللي النبي -عليه الصلاة والسلام- أرسله ليُعلم دولة، ليُعلم اليمن، أرسله النبي -عليه الصلاة والسلام- مع علي بن أبي طالب ليُعلم اليمن.

معاذ بن جبل شبَّك النبي -عليه الصلاة والسلام- يده في يده، ثم قال: **"والله إني لأحبُّك، والله إني لأحبُّك"**، ومن السنة إذا أحببت أحًا لك في الله أن تقول له، اجهر بها، سايبها في قلبك بس ليه! طلَّعها، اصدق، وأنا أنصحك: اصدق في هذه الكلمة، لا تقلها إلا إذا استشعرتها بجد؛ عشان تحس بلذتها.

والله العظيم يا إخواننا، والله أنت لو حبيت أخ لك في الله، حتى لو واحد في الدنيا، حتى لو واحد، بس فعلاً تبقى المحبة لله صادقة، قلبك فعلاً بيحبه، والله العظيم هتدوق حلاوة الإيمان، هتدوق حلاوة الإيمان.

دائماً كده أقول لنفسي ولإخواني: اكتب في ورقة كده خفيفة في الأجنحة في الآخر كده اكتب من أحبهم في الله، بس بجد من أحبهم في الله، وامسك مثلاً التليفون محمولك اللي فيه ألفين رقم، وهات مثلاً اللي بتسميهم أصدقاء على الفيس بوك اللي هم زادوا على ٥٠٠٠ ومش لا قيلهم مكان، امش على دول عددي كده هتلاقي مثلاً واحد.. ده أنا بجد بجد أهو، دول قرابي دول غصب عني هم قرابي، بجدهم ما بجدهم هم قرابي، طيب عددي على ده، لا ده لما مشكلة في المستشفى بكلمه، طيب ده آه ده بتاع الأرض اللي أنا اشتريت منه الأرض،

<sup>٢</sup> صححه الألباني.

<sup>٣</sup> صحيح البخاري.

طيب ده لا ده بتاع المحمول لما أعوز أصلح محمول بكلمه، طيب ده ده يعني كنت قابلته مرة لأ، طيب ده آه ده اللي هو كان قابلني مرة في الطريق وركبت معاه في العربية وصلني، طيب ده آه ده اللي كان بيديني الأسطوانات، تصدق الرجل ده يا أخي رجل صالح، طب أحبه في الله، أنا بعمل مجد كده، آه الرجل ده أنا لما بشوفه بفتكر ربنا، فعلاً وشه منور، يااه ده الواحد مقصر فيه أوي يا أخي.

اعمل كده هتطلع من ٢٠٠٠، ٣٠٠٠، ٥٠٠٠ هتطلع منهم خمسة ستة، ده إن طلعت أصلاً، أهم دول بقى دول فعلاً اللي أنت بتحبهم في الله، دول تروح لهم البيت وتاخده هدية وتقول له: والله إني لأحبك؛ لأن النبي -صلى الله عليه وسلم- قال: **"إِذَا أَحَبَّ أَحَدُكُمْ صَاحِبَهُ فَلْيَأْتِهِ فِي مَنْزِلِهِ، فَلْيُخْبِرْهُ أَنَّهُ يُحِبُّهُ لِلَّهِ"**، فليأته في بيته وليخبره أنه يحبه، اللي أنت بتحبه في الله فعلاً تقابله تقول له: فعلاً والله إني لأحبك، تحاول تزود المحبة يوماً بعد يوم، تُنمِّيها. ولو اعترضت هذه المحبة أمور دينوية ارميها وراء ضهرك، حاول تصفّي ما بينك وبين هذا الذي أحببته في الله أن تصفي علاقتك معه من كل دنيا؛ لأن الدنيا دائماً لما بتدخل بتلوث العلاقة، فعلاً بتلوث العلاقة؛ علاقة المحبة الصادقة، صَفِّ الدنيا من قلبك، خَلِّ فعلاً محبتك له في الله.

خلى دائماً اجتماعك وتفركك كما قال النبي -عليه الصلاة والسلام- في السبعة الذين يظلمهم الله في ظله يوم لا ظل إلا ظله، عدّ منهم النبي -عليه الصلاة والسلام- في الصحيحين وفي حديث أبو هريرة: **"وَرَجُلَانِ نَحَابًا فِي اللَّهِ، اجْتَمَعَا عَلَيْهِ وَتَفَرَّقَا عَلَيْهِ"** خلى كل التناقض معه دين، قال الله قال رسوله، تذكره بالله ويذكرك بالله، خليك صافي في المحبة. دول -اسمعى بقى- لو زعلوك لو ضايقوك لو نرفزوك لو قالوك كلام أنت مش طايقه برضه ماتسيهمش، إمسك فيهم حتى لو زعلوك، ولو أنت قلت كلمة زعلوا منها روح انشالله تبوس إيدهم لغاية لما يرضوا عنك ويسامحوك. عارف ليه؟ لأن دول أحبابك في الله فعلاً، هما دول اللي هيقوا جمبك يوم القيامة، هما دول اللي هيقوا تحت ظل عرش الرحمن معاك يوم القيامة، وبغيرهم هتخرج أنت خارج الظل، هما دول يوم القيامة اللي لو لقوك عطشان هيقولك تعالى حوض النبي هناك رايحين نشرب تعالى معانا، هما دول اللي أنت وأنت نفسك تروح الجنة يقولوك تعالى احنا رايحين الجنة امشي معانا، **"وَسِيقَ الَّذِينَ اتَّقَوْا رَبَّهُمْ إِلَى الْجَنَّةِ زُمَرًا"** الزمر: ٧٣، هما دول امشي معانا، هما دول لو أنت هتقع من على الصراط في النار هيدعوك إن ربنا ينجيك، هما دول اللي لو دخلوا الجنة وأنت قصر بك عملك وأنت في النار هما اللي هيقولوا لا يا رب لا نحنأ في الجنة إلا إذا كان صديقنا معنا وحبينا معنا، هما دول اللي لو انت في الجنة في درجة أقل منهم تنظر إليهم وتشتناق فيشفعون لك عند الله -جل وعلا- ليريقك معهم في الجنة، فحتى لو أنت زعلتهم روح لغاية لما ترضيهم، قال الله -جل وعلا-: **"فَمَا لَنَا مِنْ شَافِعِينَ \* وَلَا صَدِيقٍ حَمِيمٍ"** الشعراء: ١٠٠: ١٠١.

قال الحسن البصرى: **"استكثروا من الإخوان الصالحين فإن لهم عند الله شفاعاة يوم القيامة، ساعتها يندم من لم يصاحب"** من لم يتحاب مع إخوانه في الدنيا على الخير يندم يوم القيامة ويقول: **"فَمَا لَنَا مِنْ شَافِعِينَ \* وَلَا صَدِيقٍ حَمِيمٍ"**.

يبقى حضرتك لو انت بتحب واحد بوح بما في قلبك له، ساكت ليه؟ بس قولها مجد، قولها وأنت حاسسها والله إني لأحبك، هتلاقيهم عدد محدود والله، ممكن تلاقي واحد منهم أخ انت عارفه حبيته في الله فعلاً حتى لو أنت مالتقتش بيه إلا مرات معدودة، واحد مثلاً في قرية والراجل ده قعدت معاه قعدة سكن قلبك، أنا بمحاول أجيبلك كلام فعلاً واقعي، فيه واحد شوفته مرة في القطر وأنت مسافر بس الراجل ده يا أخي أول ما شوفته حسيت كده إن الراجل ده وشه يبشع نور، مش بياض لا نور حتى لو أسود البشرة نور، وتحس إن الراجل ده مجرد ما قابلته يا أخي إنه فعلاً استريحت له أوي، سكن قلبك، وقولته طب خد رقمي وهات رقمك كلمته بس مرة، نمي العلاقة معاه واتصل بيه وقوله إني لأحبك في الله حتى لو ماشفتوش.

قال الإمام أحمد رحمه الله - تعالى: "اللهم إن لنا إخواناً لم نرهم ونحن أوثق بمحبتهم ممن نراهم كل يوم".

صح؟ فيه ناس كده، يعني مثلاً أنا ببحب جدًّا - اشهد يا رب - إني أحب عبد الله بن المبارك أنا ببحبه جدًّا، بأحبه في الله وأنا ماشفتوش، واشتاق أن أراه في الجنة. أنا ببحب جدًّا سيدنا معاذ بن جبل، سيدنا عمر بن الخطاب، وكل الصحابة بس أنا ببحب دول جدًّا، يا رب أنا أحب في الله سيدنا إبراهيم جدًّا، ببحبه في الله جدًّا سيدنا إبراهيم، وحب سيدنا عيسى في الله جدًّا، لما تذكر اسمه كده سيدنا إبراهيم سيدنا عيسى سيدنا هارون دول أنا ببحبهم في الله جدًّا، وكل الأنبياء بس دول ليهم مزية في قلبي، يا رب إني أحب نبيك محمد - صلى الله عليه وسلم - ببحبهم في الله جدًّا، يعني ماشوفناهومش ونحن أوثق بمحبتهم ممن نراهم كل يوم.

فأنت كده اللي بتحبه أصدق في محبتك، ولو قدير أن تقابله قوله إني أحبك في الله. أنا عاوزك تعيش اللذة دي، أنا أذكر الآن أسأل الله - تعالى - أن يرحم أخى محمد فهمى ماحدش يعرفه، أخ اسمه محمد فهمى أخ طيب بسيط كان بعيد عن ربنا وقرب لربنا، حضر محاضرات وقرب من ربنا، الأخ ده فعلاً أنا وجدت حلاوة الإيمان - أنا بقول اسمه عشان أدعيه ربنا يرحمه ويغفر لنا وله - وجدت فعلاً حلاوة الإيمان ولذة الإيمان بمحبتني له ومحبتني لي، كان فعلاً محبة صادقة في الله - أرجو ذلك -، وابتلي بعد أن تاب إلى الله وصدق في التوبة كما أحسبه والله حسيبه ولا أركي عليه أحدًا، ابتلي بابتلاءات وأصيب بسرطان في الدم كلما دخلت عليه وجدت نفساً سمحة، وقلباً طيباً ولساناً ذاكراً مع شدة الألم الذى كان يعيشه، وكنت إذا دخلت عنده لا أسمع عنده إلا الحمد لله أنا في نعمة، مع شدة الألم، وكنت دائماً أقول له: إنما سيعجل بأحبنا أو بأصدقنا، ولعله كان أصدق مني فسبقتني إلى الله - جل وعلا - . فلما توفي رأيته في المنام أنه في الجنة، وقبل أن يتوفى بليلة أو ليلتين رأى هو في المنام إنه رايح الجنة وبعدين وقف شوية كده فأنا قولتله يا محمد فيه إيه؟ أنت واقف ليه؟ تعالى، قالي: أصل أنا تعبان شوية، قولتله لأ إنت مش تعبان تعالى اجري على الجنة، راح جاري ودخل الجنة، كان هو ساعتها يا إخوانا الرؤيا دي شافها وهو في الحرم قبل ما يموت بأيام، وهو في الحرم كان ممشينه على عربية، مايعرفش يتحرك، مايعرفش يمشي، قام من الرؤيا دي جري على دورة المياه بدون كرسي اتوضا ورجع وقف يصلي في الحرم، لما شاف اللي قاله إنت مش تعبان التعب راح، وما هي إلا أيام أرجو أن يكون قد استراح. يا إخوة أنا باحاول إني أذكره عشان أسأل الله - تعالى - أن يغفر له ويرحمه وجميع موتانا وموتى المسلمين.

يا إخوانا والله وأنا باتذكر الآن أنا مش عارف أوصلكم الإحساس القلبي اللي أنت هتحسه واللذة والسعادة اللي أنت هتحسها وحلاوة الإيمان اللي أنت هتذوقها لو صدقت في محبة إخوانك في الله. لا تسكت، قل له إني أحبك في الله، الكلمة دي هتزد الحب، اديله هدية هتزد المحبة، كلمه، اتصل بيه، قابله، فالود يزيد المحبة. الود يعني إيه؟ إن إنت تترجم هذه المحبة بحاجات عملية، عارف لما واحد يقولك تعالى وديني، وديني يعني إيه؟ تعالى زورني، في الزيارة دي الكلام ده بيوزد المحبة.

فالنبي - عليه أفضل الصلاة والسلام - زاد من محبته لمعاذ بن جبل، وزادت محبة معاذ بن جبل للنبي - عليه الصلاة والسلام - حين قال كل واحد منهما والبداية كانت من النبي - صلى الله عليه وسلم - : والله إني لأحبك، فأجابه معاذ: والله إني لأحبك. أنا عاوز أوصلك بقى إن اللي هيطلع دلوقتي بعد الكلام ده، ده كلام محب لحيبه، ده خلاصة خلاصة محبة القلب ينصحها لحيبه. قاله بص أنا ببحبك، انت عارف إني ببحبك جدًّا، عشان كده خد دي ماتسيبهاش، أوعى تسيبها دي مهمة جدًّا. قال له النبي - عليه السلام - : "لا تدعن دبر كل صلاة - مش قاله قل دبر كل صلاة - قاله إيه؟ ماتسيبش دي، دي حاجة مهمة جدًّا، "لا تدعن في دبر كل صلاة تقول: اللهم أعني على ذكرك، وشكرك، وحسن عبادتك"

العلماء مختلفون هل هذه تقال بعد السلام أم قبل السلام؟ فقال بعضهم إن كلمة دبر ملاصقة للشيء، فدبر الإنسان فيه، قالوا إذاً دبر كل صلاة يعني في كل صلاة قبل السلام وقال بعضهم إنما قصد النبي دبر كل صلاة أي بعد كل صلاة، كما قال مثلاً في آية الكرسي، هنتكلم

عنها إن شاء الله قول النبي -عليه الصلاة والسلام-: "من قرأ آية الكرسي دُبُرَ كُلِّ صَلَاةٍ لم يمنعه من دخول الجنة إلا أن يموت"° والوارد أنها كانت تقال بعد الصلوات المكتوبة.

فاختلفوا فيها، فإن قلتها قبل السلام أو قلتها بعد السلام فأرجو أن تكون قد حققت حديث النبي -عليه الصلاة والسلام-. لكن المعتاد عندنا إننا بنقولها متى؟ بعد السلام، وهذا قول الشيخ ابن باز -رحمه الله تعالى- أنها تقال بعد السلام، وإن كان الشيخ ابن عثيمين نفسه -كلاهما من كبار علمائنا ومشايخنا- يرى أنها تكون قبل السلام، الشيخ بن عثيمين قال أن الأرجح أو الأقرب لديه أنها تكون قبل السلام، وإن قيلت بعد السلام فلا بأس.

فهذه من أذكار الصلاة اللهم أعني على ذكرك وشكرك وحسن عبادتك. اللهم أعني يعني أنت حضرتك مش هتعرف تقول كلمة؛ أستغفر الله ولا سبحان الله ولا الله أكبر مش هتعرف تقولها إلا لو أعانك الله. مش هتعرف تدخل المسجد أصلاً عشان تصلي إلا لو أعانك الله، مش هتعرف تغض بصرك عن الحرام إلا إذا أعانك الله، مش هتعرف تثبت أمام المعاصي إلا إذا ثبتك الله، هو ده المعنى اللي لازم يوصل لقلبك، لن تُعان إلا بعونه، ولن تُكرم إلا بكرمه، ولن تثبت إلا بتثبيتته، ولن تنصر إلا بنصره ولن تنجح إلا بعلمه، ولن توفق إلا بتوفيقه، ولن تسدد إلا بتسديده، ولن تلهم إلا بإلهامه، ولن تتحول عن أي معصية إلا بقدرته، ولن تقدر على أي طاعة إلا بعونه وتيسيره.

قال الله -جل وعلا-: "فَأَمَّا مَنْ أَعْطَى وَاتَّقَى \* وَصَدَّقَ بِالْحُسْنَى \* فَسَنِيَرُهُ لِلْيُسْرَى" الليل ٥:٧، يعني هي أصلاً يسرى، يعني هي أصلاً الطاعة مش صعبة، سؤال يا إخوانا هو لو كانت خمسين صلاة كنتوا متصلوا؟ مش هما كانوا خمسين وسيدنا موسى نصح النبي -عليه الصلاة والسلام- أرجع إلى ربك أسأله التخفيف؟ والنبي -عليه الصلاة والسلام- يطلع وينزل مرات تقل كل مرة خمسة لغاية ما وصلت لخمسة، سيدنا موسى قاله برضه أرجع إلى ربك أسأله التخفيف، قال استحييت من ربى. ما هو عشر مرات يطلع وينزل، طب لو هما كانوا خمسين صلاة احسبهم كده، خمسين صلاة على أربعة وعشرين ساعة يعني فرض كل أد إيه؟ أقل من نص ساعة كمان، صح؟ ٢٥ دقيقة مثلاً، يعني كل ٢٥ دقيقة فرض، يعني مش هتستتوا بين أذان الفجر والإقامة نص ساعة زي ما بتعملوا كده، يكون عدى عليك فرض، ده حضرتك المؤذن يطلع يأذن، الأذان ياخذ له تلت أربع خمس دقائق، وصلي السنة بسرعة، قيم الصلاة بسرعة، صلي بسرعة، قول أذكار الصلاة، يلا أذن للفرض الثاني. يعني ٢٥ دقيقة بين الأذان والأذان، بعد الأذان بقى تصلي سنن ولا مفيش سنن؟ وبتصلي سنة بعدية ولا مش هتلحق؟ يعني انت مش هتخرج من المسجد، طب كنت هتصلي ولا مش هتقدر؟ كنت هتصلي لازم، لازم تصلي، كنت هتقعد في المسجد تعكتف، طب هتاكل إزاي؟ طب هتنام امتي؟ طب هتتزوج ولا مش هتتزوج؟ خلاص طب هتكلم اللي جنبك ولا مش هتتلحق تكلمه؟ مفيش وقت، ومع ذلك كنا هنطبع ربنا، طب هما خمسة، دلوقتي الناس ولو بيصلي في المسجد حد يجي يصلي الفجر في البرد ده؟! أنا أصلاً باسهر ومقدرش أصلي الفجر، طب والظهر؟ أنا في الشغل والعمل عبادة أصلي لما أروح، طب والعصر؟ أصل أنا بروح ع الساعة ٢ يدوب باكل لقمة بتبقى الساعة اتنين ونصف ما بقدرش أنزل أصلي بصراحة، ده أنا بنام ما بقدرش أقوم أغسل أيدي، طب والعشاء؟ يا عم العشاء وقتها ممدود لما أروح بالليل أبقى أصلي. مش دي حجج الناس والمغرب ده إن صلاها في المسجد، يعني ألقى واحد كده الساعة خمسة قبل ما يروح للعمل الإضائي أروح أنا أصلي المغرب في المسجد ألقيه، أقول له صلي، يقول لي صليت، صليت فين؟ أنا باصلي قبل ما أنزل، بيصلي قبل ما ينزل يعني عشان رايح الشغل، طب ما تنزل صلي في المسجد، طب فين الصلوات؟

خلى بالك اللي دخل المسجد، اللي قام الفجر دلوقتي، اللي اتوضا بالميه الباردة، اللي جه دخل المسجد، اللي دخله ربنا، هو اللي أعانه على كده، هو اللي هداه لكده، هو اللي يسر له هذا، هو الذي حبب إلى قلبه هذا، فيه ناس الآن محبب إليهم الفراش، وإلى الآن على الفراش، وفيه ناس محرومة، محرومة فعلاً مش امبارح كان فيه جنازة الظهر في المسجد؟ إيه اللي حصل؟ الناس واقفة بره ما بتصليش، فيه ناس واقفة بره ما بتصليش، طب يا عم ده الناس دخلت اتوضت وقعدت وأنت كده كده الوقت ضايع، وكده كده ماوركش حاجة، وكده كده مستني لما يخرج ابن الميتة عشان تسلم عليه وتعزيه، طب ادخل المسجد اتوضا وصلي وأقعد، واقف ليه في الشمس بره؟ ولا واقف ليه في العفرة؟ ولا واقف يدخن ليه؟ محروم ليه؟ أنت حالف ما تدخل إلا لو محمول؟ فيه ناس كده ما بتدخلش إلا محمولة على الأعناق عشان يُصلى عليها، ما تدخل، أنا لما بشوف ده بقول ده فعلاً محروم، الهداية بإذن الله، العون من الله.

إيه اللي يخليك تروح ستين سنة شغل، أربعين سنة في الحكومة من وأنت عندك عشرين سنة لغاية ما تحالت على المعاش ستين سنة، آدي أربعين سنة شغل فيه ناس كده والله، ونفسه يحج وقعد يحوش يحط القرش على القرش، والحج زاد والتأشيرة زادت، ويقعد يبيع أرض وألا يبيع شقة كل ده عشان نفسه يحج، ويأخذ شهر أجازة، ويروح هناك يتعب يطوف وهو تعبان ويسعى وهو مجهد، ويروح يقف على عرفة في شدة الحر، ويروح يرمى في الجمار ويعرض نفسه للهلاك من شدة الزحام، ويغيب عن أهله، ويجيب هدايا، إيه اللي مخليك تعمل الكلام ده؟ ده أنت رايح تطوف حوالين حجر وتقف على حجر وترمي حجر بحجر، مش ده الحج؟ إيه اللي مخليك تعمل الكلام ده؟ إن ربنا حبب هذا إلى قلبك، روحك بتنهفهف عليه، زي مايقولوا، هو ده ربنا اللي قاله فاستجاب دعوة سيدنا إبراهيم: **"فَأَجْعَلْ أُمَّتَهُ مِنَ النَّاسِ هَوًى لِيَبْهَمَ"** إبراهيم: ٣٧، هو ربنا اللي جعل في قلبك الحب ده. فيه واحد معاه فلوس أكثر من فلوسك، وماراحش صح؟ عنده عمارات وأنت معندكش حاجة خالص وبرضه ماراحش، معاه عربيات وأطيان وأنت نفسك تروح وهو برضه ماراحش، عنده صحة أحسن منك يفصل منك عشرة وأنت روحت تزحف وهو برضه ماراحش، ده مين؟ ده محروم، إنت ربنا أراد بك الخير، جعلك تبذل وتحط القرش على القرش، وتعمل جمعيات عشان تروح لإنه يبحبك -سبحانه وتعالى-، هداك لذلك، أكرمك بذلك، جعل قلبك يهوى ذلك، يجب ذلك، **"فَأَجْعَلْ أُمَّتَهُ مِنَ النَّاسِ"** اللي بقى معاه وماراحش محروم فعلاً زي ما بقولك، محروم، ودي مش كلمتي دي كلمة النبي -صلى الله عليه وسلم-، كما قال النبي -عليه الصلاة والسلام- في حديث ابن عباس وفي صحيح الجامع للشيخ الألباني يقول الله -جل وعلا- **"إِنَّ عَبْدًا أَصْحَحْتُ لَهُ فِي بَدَنِهِ -يعني صحته كويسة- وأوسعته له في رزقه -ربنا وسع عليه- تمضي عليه خمسة أعوام لا يفد إليّ لخروم"**، ربنا حرمة من الخير ده، إنما اللي راح ده كرم ربنا، ربنا هو اللي أدخله بيته، هو ده بيت من؟ بيت الله -عز وجل-، هو ممكن تدخل بيت ملك من الملوك بدون إذن؟ رئيس من الرؤساء، سلطان من السلاطين، أمير من الأمراء، تدخل كده قصره كده وخلص؟ لا، ده دعوة رسمية وتدخل بعد ما تعدي على حراسات وتفتيشات ومش أي واحد يدخل، ده اللي هو مطمئن لهم ومطمنين له، واللي يحبهم ويحبوه، إنما حضرتك ده أنت على بعد سبعة كيلو ماتقربش، صح ولا لا؟ لن يدخل هذا الملك أحداً بيته إلا إذا اختاره واصطفاه واجتباها، هذا بيت الله ما دخلت هذا البيت إلا لما اختارك الله، هي دي معنى **اللهم أعني** إن ربنا هو اللي أعانك على كده، هو اللي هداك لكده، هو اللي جابك هنا، جاء بقلبك هنا أولاً -سبحانه وتعالى-. قال -تعالى-: **وَلَكِنَّ اللَّهَ حَبَّبَ إِلَيْكُمُ الْإِيمَانَ بَقِيَ الْعَمَلُ رَبَّنَا، دِي الْكَلِمَةُ الَّتِي النَّاسُ الطَّيِّبِينَ بَيَقُولُوهَا: يَا عَمَّ الْعَمَلُ عَمَلُ رَبَّنَا، هُوَ الَّتِي عَمَلَكُ كَدَهُ، هُوَ الَّتِي حَبَّبَ فِي قَلْبِكَ الْإِيمَانَ فَأَعَانَكَ عَلَيْهِ، "وَلَكِنَّ اللَّهَ حَبَّبَ إِلَيْكُمُ الْإِيمَانَ وَزَيَّنَهُ فِي قُلُوبِكُمْ وَكَرَّهَ إِلَيْكُمُ الْكُفْرَ وَالْفُسُوقَ وَالْعِصْيَانَ" الحجرات: ٧.**

يسرك ليسرى، عمرك شفت حد واقف على باب المسجد يقطع تذاكر للي داخل؟ أو مثلاً تدخل بكارنيه حضرتك أو اشتراك سنوي وتدخل بكارنيه؟ مفتوح، بس مش هيدخل إلا اللي ربنا أعانه، مش هيدخل إلا اللي ربنا اصطفاه، مش هيدخل إلا اللي ربنا اختاره، هو كده الصلاح ده مش بإيدك أنت أولاً، ده بيد الله عون من الله.

قال الله -جل وعلا- عن نبيه يونس: **"فَاجْتَبَاهُ رَبُّهُ فَجَعَلَهُ مِنَ الصَّالِحِينَ"** القلم: ٥٠، اللي عملك صالح مين؟ اللي جعلك صالح مين؟ اللي هداك للصلاح مين؟ اللي حيب إلى قلبك الصلاح هو ربنا، **"فَجَعَلَهُ مِنَ الصَّالِحِينَ"** عشان كده أي حاجة قول يا رب، قول يا رب، لن تثبت إلا بتثبته. النبي نفسه -صلى الله عليه وسلم- ما ثبت على الطريق ولا ثبت مع القرآن إلا لما أعانه الله -جل وعلا- لما ثبتته الله. لولا الله ما اهتدينا، هذا الذي كان يتغنى به الصحابة، بل وكان النبي -صلى الله عليه وسلم- يقوله يوم الأحزاب، يد بها النبي صوته يعني إن صحت يتغنى بها رسول الله، يقول:

وَاللَّهِ لَوْلَا اللَّهُ مَا اهْتَدَيْنَا، وَلَا تَصَدَقْنَا وَلَا صَلَّيْنَا يعني لو ربنا ما كناش إيه؟ لا صلينا ولا اتصدقنا ولا صومنا ولا عملنا طاعة، وَاللَّهِ لَوْلَا اللَّهُ مَا اهْتَدَيْنَا، وَلَا تَصَدَقْنَا وَلَا صَلَّيْنَا، فَأَنْزَلْنَا سَكِينَةً عَلَيْنَا، وَثَبَّتِ الْأَقْدَامَ إِنْ لَاقَيْنَا، إِنَّ الْأُلَىٰ قَدْ بَغَوْنَا عَلَيْنَا، إِنْ أَرَادُوا فِتْنَةً أَبِينَا أْبِينَا، النبي يعملها كده يد بها صوته ويرفع بها صوته أْبِينَا أْبِينَا.

فلولا الله ما اهتديت قال الله للنبي -عليه الصلاة والسلام-: **"وَإِنْ كَادُوا لَيَفْتِنُونَكَ عَنِ الَّذِي أَوْحَيْنَا إِلَيْكَ لِتَفْتَرِيَ عَلَيْنَا غَيْرَهُ وَإِذَا لَا تَخَذُوكَ خَلِيلًا"** الإسراء: ٧٣ **"وَلَوْلَا أَنْ هُوَ مِنِّي لَأَمَّا لَيَكُونَنَّ عَنِّي كَفَاحًا بِأَعْيُنِنَا"** ولولا أن ثبتك ولا ثبتناك هي دي نون العظمة بقى، نون العظمة من الله، يعني التثبيت محدش يقدر يثبت بنفسه أبداً إلا بعون من العظيم -جل جلاله-: **"وَلَوْلَا أَنْ تَبَتَّنَا لَقَدْ كِدْتُمْ تَزْكُنُ إِلَيْهِمْ شَيْئًا قَلِيلًا \* إِذَا لَأَذْفَنَّاكَ ضِعْفَ الْحَيَاةِ وَضِعْفَ الْمَمَاتِ ثُمَّ لَا تَجِدُ لَكَ عَلَيْنَا نَصِيرًا"** الإسراء: ٧٥:٧٤، لولا تثببت الله لك يا رسول الله ما ثبتك، ببساطة، أي حاجة بقى في دينك أو دنياك، اعرف كده لولا عون الله لك عليها ما قدرت. أنت في كل فاتحة بتقرأها بتقول إيه؟ **"إِيَّاكَ نَعْبُدُ وَإِيَّاكَ نَسْتَعِينُ"** يعني لن أستطيع أن أعبدك إلا إذا أعتني.

من الذي قال: **"فَصَبْرٌ جَمِيلٌ وَاللَّهُ الْمُسْتَعَانُ"** يوسف: ١٨، مين اللي قالها؟ سيدنا يعقوب، يعني أنا مش هاقدر أصبر إلا إذا أعانني. أي إنسان مثلاً ابنه يموت أو أبوه يموت أو أخوه يموت اللي هو يعني روحه، أقرب الناس له يموت مثلاً يحس إنه هو خلاص هيموت، مش قادر ربنا يوم بعد يوم يثبتته ويعينه ويربط على قلبه.

شوف السيدة أم موسى لما ابنها راح منها زي ما بيقولوا كده روحه راحت، صح؟ روحه راحت ابنها راح، تخيل ربنا قالها خايفة عليه؛ ارميه في البحر، **"فَإِذَا حَفَّتْ عَلَيْهِ فَأَلْقِيهِ فِي الْبَيْمِ"** القصص: ٧، مش ده معنى الآية لو خايفة عليه ارميه في البحر، تحطه في الميه وتقعده تدعى ربنا اللهم باعد بينه وبين فرعون كما باعدت بين المشرق والمغرب، هي حاطاه وخايفة عليه وعاوزه تبعده عن مين؟ يفضل ماشي؛ تخيل المشهد الميه تاخده وتروح عند فرعون، ترمي طوبة عشان تبعده برضه يقرب لقصر فرعون يروح يشبك في السنارة -أنا باضرب مثل- اللي قاعد عامل فرعون يصطاد بها قدام قصر فرعون، يعني أنا بقول بلاش هنا يجي هنا، ده الموج كان جاي كده بمشي عكس الأمواج لغاية لما يروح عند قصر فرعون، في الوقت اللي يطلع فيه فرعون يتفرج من الشباك، ويقولهم إيه ده؟ هاتوه، -سبحان الله- ويشوفه فرعون ده يتقتل، تتطلع زوجته تشوفه تقول لا إلا ده، طب اشمعني ده ما احنا قتلنا خمسة آلاف واحد قبل كده، إلا ده وخلص، أنت متخيل بقى قلب الأم وهي قاعده؛ هيعمل إيه دلوقتي؟ زمانه هيفصل راسه ولا يقطع، ابني، زمانه بيعيط دلوقتي، زمانه بقاله أد إيه مرضعش، طب أعمل إيه؟ شوف قلب الأم؟ شوف ربنا بيقول إيه؟: **"إِنْ كَادَتْ لَتُبْدِي بِهِ لَوْلَا أَنْ رَبَطْنَا عَلَىٰ قَلْبِهَا لِتَكُونَ مِنَ الْمُؤْمِنِينَ"** القصص: ١٠، لولا كده كانت روحها راحت، كان قلبها اتقطع، **"لَوْلَا أَنْ رَبَطْنَا مِيزَانَ الْوِزْنِ"** مين اللي ربط؟ مين اللي هيشبك؟ مين اللي هيصبرك؟ مين اللي هيعينك على الصبر؟ هو ربنا **"فَصَبْرٌ جَمِيلٌ وَاللَّهُ الْمُسْتَعَانُ"**.



سيدنا يوسف عشان تعرف إن اللي هيصبرك عن المعاصي، إنك تسبب المعاصي؛ السجارة اللي في بفقك دي، ولا في جيبك دي، بطلتها ورجعت، وبطلتها ورجعت، قوت بصراحة أصل أنا ما عنديش عزيمة، تيجي تقوله بطل دلوقتي، يقولك أنا حاولت قبل كده ١٠٠ مرة، سبتها سنة ورجعت، وسبتها تلت شهور ورجعت، أنا مش هاقدر أنا ما عنديش عزيمة، منا عارف إنك ما عنديش عزيمة، لا عندك إرادة لا عندك إرادة كويسه ولا عزيمة كويسه وأنت ضعيف، عارف أنت رجعت لها ليه لإنك اعتمدت على عزميتك، واعتمدت على إرادتك، واعتمدت على قوتك، لكن لو بطلتها واعتمدت على ربك قوتك له يا رب أنا ما عنديش عزيمة، إنما العون منك، أنا مش هاقدر أسيها إنما بقدرتك أقدر، بتقديرك هاقدر.

سيدنا آدم نبي مُعَلِّم؛ **"وَعَلَّمَ آدَمَ الْأَسْمَاءَ كُلَّهَا"** البقرة: ٣١، ربنا علمه كل حاجة، مُكَلِّم؛ يا آدَمَ هو يقول: ربنا، يعني هو بيكلم ربنا وربنا بيكلمه، نبي مُعَلِّم مُكَلِّم سكن الجنة، يعني واحد شاف الجنة، ومع ذلك ربنا قال عنه: **"وَلَقَدْ عَاهَدْنَا إِلَى آدَمَ مِنْ قَبْلِ فَنَسِيَ وَلَمْ نَجِدْ لَهُ عَزْمًا"** طه: ١١٥، تيجي تقول أنا عندي عزيمة أنا، لا أنت ضعيف خالص، لو أنت اعتمدت على عزميتك مش هتتعرف تسبب البنت اللي بتحبها، مش هتتعرف تمسح الأفلام اللي أنت جمعتها، مش هتتعرف تشيل الكليبات اللي أنت أدمنتها، مش هتتعرف تترك العادة الخرمة اللي أنت اتعودت عليها، لو أنت اعتمدت على جهدك وقوتك وتقول أنا إن شاء الله هاقدر وأنا قوى الإيمان، لا أنت ضعيف، واحد مؤمن؛ يظن إنه مؤمن، عارف الأب اللي يقول عن بنته لا لا إلا بنتي، يا عم لبسها الحجاب، دي هي لو أنا حطيتها في وسط ١٠٠ راجل عمرها ما تبص لحد، أنا عارفها، دا أنا مربيها وعارفها، لا يا حبيبي ده غمزة واحدة بس تخليها تقع، أنت المؤمن اللي بتصلي الفجر ممكن واحدة ضحكت لك في الشارع تسيح، ما تعرضش نفسك للفتنة وتقول أنا مؤمن، لأنه عون الله وليس قدرتك، عون الله وليس إيمانك اللي أنت معتمد عليه، أنت ولا حاجة. النبي -عليه الصلاة والسلام- يقول عن الدجال: "من سمع بالدجال فليأمن عنه، فوالله إن الرجل ليأتيه وهو يحسب أنه مؤمن -فاكر نفسه مؤمن وراجل-، فيؤمن به لما يبعث به من الشبهات".<sup>٧</sup>

اوعى تقول أنا هادخل على غرف الشيعة أما أشوف الناس بتقول إيه، أو اسمع على غرف النصارى أما أدعوهم، لا أنت ممكن تفتن، والشيطان يقعد يدور في دماغك بالليل الكلام اللي أنت سمعته وليس عليك دينك، تخرج وقد اهتز إيمانك، أنت ضعيف يا حبيبي، أنت ضعيف إلا بتقوية ربك. احنا ولا حاجة إلا بالله، أنت لله ومن الله وبالله، أنت لله المفروض كلك الله حياتك لله؛ **"قُلْ إِنَّ صَلَاتِي وَنُسُكِي وَمَحَبَّاتِي وَمَمَاتِي لِلَّهِ"** الأنعام: ١٦٢، وأنت من الله؛ هو الذي نفخ فيك من روحه، وأنت بالله؛ لن تصلي إلا بالله، لن تعاذ إلا بالله، لن تقدر على خير إلا بالله، لازم المعنى ده يا إخوانا هو يساوى كلمة **اللهم أعني** إنك تعرف إن العون من الله، ده كلمة يساوي **لا حول ولا قوة الا بالله** يعني **لا تحول عن المعصية ولا قوة على الطاعة إلا بالله**.

حط بقى أي حاجة؛ لا تحول عن لذة الفراش ولا قوة على قيام الليل إلا بالله، يعني عون الله لك، لا تحول عن الفتاة التي أحبها ولا قوة على العفة إلا بالله، لا تحول عن المال الحرام الذي يتزخرق أمامي ولا قوة على الحلال إلا بالله، وعلى هذا فقس. فأرجع وأقول لك يا عبد الله إنما أعانك الله -جل وعلا- وأدخلك بيته ويسر لك طريقك، وده عون ربنا؛ **"فَسَنِّيَسِرُهُ لِلْيُسْرَى"** المساجد ببلاش ومحدث بيحسبها عليك، ولا ليك خمس مرات في الشهر تدخل فيهم المسجد، لا براحتك خالص المسجد مفتوح ادخل في أي وقت، محدش هيقولك حاجة، في حين إن الضلالة بفلوس، الضلالة والفساد بفلوس، هات حفلة مثلاً بتاعة رقص السنة اللي فاتت، الممثل الفلاني أو المطرب الفلاني والراقصة الفلانية اللي عندها ٦٥ سنة ورجعت ثاني، مش عارف ده حسن ختام ولا سوء ختام مش عارف والله، يعني حفلة هتدفع لها فلوس ولا مش هتدفع لها فلوس؟ ربنا قال: **"يَشْتَرُونَ الضَّلَالََةَ"** النساء: ٤٤، اللي عاوز يقع في الفاحشة بيدفع فلوس

<sup>٧</sup> روايات الحديث هنا

ويبتعد ويبذل، **يَشْتَرُونَ الضَّلَالََةَ** الضلال بيتشري، إيه ده اللي بتشتريه يا عم؟ ما تاخذ الطاعة الرخيصة السهلة وربنا اللي هيسرها لك **فَسَنْيَسِرُهُ لِلْيُسْرَى**. يعني الضلالة أصلاً صعبة ربنا سماها **عُسْرَى** وفيه ناس برضه مصممة تعملها، أهو ده بقى لو تيسرت له تبقى مصيبة كبيرة؛ **فَسَنْيَسِرُهُ لِلْعُسْرَى**.

"**وَأَمَّا مَنْ بَخِلَ وَاسْتَعْتَى \* وَكَذَّبَ بِالْحُسْنَى \* فَسَنْيَسِرُهُ لِلْعُسْرَى**" الليل: ٨: ١٠ تبقى معصية عسيرة وتيسر له. وخلي بالك لما تلاقي الطاعة بالنسبة لك سهلة احمد ربنا هو اللي أعانك وسهلها لك، ولما تلاقي المعصية بالنسبة لك صعبة احمد ربنا إنه جعلها عسيرة عليك، ماترعلش. يبقى واحد عاوز يعمل غلط ومش لاقى ومش عارف، وصاحبه يقول له يا عم ده بيترموا علينا كده من كل حنة، فين يا عم اللي بيترموا دول ما أنا مش لاقى؟ احمد ربنا احمد ربنا إنها بقت صعبة بالنسبة لك، إن ربنا صرفك وصرفها عنك، هو ده طلب العون والمدد من الله -جل وعلا-، طلب العون والمدد على كل شيء.

سيدنا يوسف لما وقع في شدة الفتنة اتقفلت الأبواب "**وَقَالَتْ هَيْتَ لَكَ**" يوسف: ٢٣، امرأة جميلة ذات منصب وجمال وهي الداعية، وهو شاب أعزب وهو غريب وهو عبد، والأبواب مغلقة، والوعد إن فعل، والوعيد إن لم يفعل، أسباب كثيرة جداً للوقوع فيها، إيه اللي حصل؟ مقالش إلا أنا، ده لو ١٠٠ امرأة قدامي هنا نضيف، لا يا حبيبي، قال الله -تعالى- عن سيدنا يوسف: "**وَعَلَّقَتِ الْأَبْوَابَ وَقَالَتْ هَيْتَ لَكَ**" **قَالَ مَعَاذَ اللَّهِ** معاذ الله يعني إيه؟ كلمة أعوذ يعني إيه؟ يعني ألجا وأحتمي، أنا ما أقدرش، معاذ الله يعني أنا يا رب أنا لجأت لك أنت بس، أنا مش هاثبت إلا بيبك، عشان كده ربنا قال: "**وَلَقَدْ هَمَّتْ بِهِ وَهَمَّ بِهَا لَوْلَا أَنْ رَأَى بُرْهَانَ رَبِّهِ كَذَلِكَ لِنَصْرِفَ عَنْهُ السُّوءَ**" يوسف: ٢٤، مش هو اللي انصرف بإرادته ده بعون ربه، مش هو اللي هرب برجليه ده ربنا اللي أهمله، ده ربنا اللي سدده، ده ربنا اللي قواه على المعصية، ربنا أعانه على إنه يتركها، فلن تعان على ترك أي معصية ولن تعان على أي طاعة إلا بالله، فقل يا رب.

**اللهم أعني على ذكرك وشكرك وحسن عبادتك**، هذا ما يرضي ربك، ولعل الله إن قدر لنا لقاءً ثانياً نستزيد فيه بعض الشيء من هذا إن أحيانا الله -تعالى-، لكن أردت فقط في هذا اللقاء أيها الكرام أن تلقي قلبك في ساحة الملك، أن تتبرأ من حولك وطولك وقوتك، إنك تعرف إنك ولا حاجة إلا لو أعانك، ده اللي عاوز أوصله لقلبك إن أنت ولا حاجة بغير ربك، سنذك -سبحانه وتعالى- معينك مؤيدك ناصرك مسددك مقويك -سبحانه وتعالى-، فكل منه -سبحانه وتعالى-.

أسأل الله -جل وعلا- أن يمدنا وإياكم بمدد منه، وأن يعيننا وإياكم على ما يرضيه، اللهم أعنا على ما يرضيك، اللهم أعنا على أن نترك كل ذنب لا يرضيك، اللهم أعنا على ذكرك وشكرك وحسن عبادتك، اللهم أعنا على قيام الليل، وأعنا على غض البصر، وأعنا على حفظ الفرج، وأعنا على ترك الحرام، اللهم أعنا على الصيام والقيام، اللهم أعنا على بر والدينا، اللهم أعنا على الدعوة في سبيلك، اللهم أعنا على الجهاد في سبيلك، اللهم أعنا على الصبر على لأواء الدنيا وبلائها، اللهم أعنا على تلاوة القرآن، اللهم أعنا على قراءة القرآن، اللهم أعنا على كل عمل يقربنا منك، اللهم أعنا على أن نلهج بذكرك، اللهم أعنا على ما يرضيك عونا منك وحدك لا شريك لك، اللهم لا حول ولا قوة إلا بك، فحولنا عن كل معصية وقونا على كل طاعة، نحن وإخواننا وآبائنا وأمهاتنا وأزواجنا وذرياتنا بكرمك وقدرتك وقوتك يا قوى يا كريم، إنك يا ربنا نعم المولى ونعم النصير، سبحانك رب العزة عما يقولون، وسلام على المرسلين، والحمد لله رب العالمين، وصلى الله على نبينا محمد وآله وصحبه.

والسلام عليكم ورحمة الله وبركاته